

Yuda Yudaho bapiya ngo Duichon owi amna ambaracha irim togoc

Yongburoc mata: Bapiya ngo woi 2Pita woroc simbang. Fandat fanadat amna au yu fatmata ogepmahon foro nongnongo wo imu fauna suraro imanang mata fanadat inong tonggung. Ihoroc tuya toroc kiap wömunoho surarodec morögigoc. Worocha tongga Yudaho garac mata orongi ngo suraro topic topicha irim tongo siuna onggoc.

¹ Noc Yuda, noc Yesu Duichon youp amna orin Jems yuhon orugo itat. Oro, nocho bapiya ngo owi amna Kopotorocho inong wodigocma ‘sontha’ yongo irim tat. Nandöng Kopotoroc yu sontha toup kumbing-itac. O Yesu Duic yu gön tongga ida son kangtorengitac.

² Kopotorocho sontha uroci kumbingga kang banangmuna irot soni tun guc mauna irot imoc imoc kiap sonot toup macfihun.

Kopotorochon ayamiho suraro dongyu moin toctocho tang

³ Son nakain nucnai sinom, nocho osuc Kopotorocho yaö youp tuna non ambarac yuhon kunkun feno öngkubomon, worochon mata irim toctocho toup kombigot. Noc ihoroc toctocho kombigot mahong mit wömai nocho irotna mongurac tongo ‘mata moröma au irim towa’ yongo kiring kamoc kamocho tat. Mata wömai ingoroc: Kumbing tobic tobic kiap wömai

Kopotorocho inoin owi amnani imuna kōmbaha edengoc. Tuna son muyu gön tongga kombing tobic tobic soni wo angtorecio sinom tongmuya itongitnung. ⁴ Wōmai yaha, amna wōmuno au yu suraro sonidec sakau figoc. Yuhon foro wōmai eran mai öp itac. Yu wōmai Kopotoroc makombing iming. O yu banac banachon fatmata ogepma tu gendōng onguna worocho inoin itonggong kiap yangam fapfapni imongtoc tontac. O yuho Morōm noni Duic woi bigo noni tungu, yuha möp yongo yu urop imu fadoc. Worocho tongga osucgon Kopotorocho yu ‘ep bohōngon fat itnung’ yongo weran togoc.

⁵ Son Israel nanohon mata fat urop kombiang mahong nocho worochon matano ta fusun dihun. Osuc wōmai Kopotorocho Israel nano Isip nanohon oburodec öcangyun muuya orung idung. Ihoroc togoc mahong mit wōmai yu Israel nano kombing tobic tobicno muno dongyun obukogung. ⁶ O ihorocgon, sum yaru au yu youp Kopoto-rocho imogocma me imongo önggōngyi tongo inoin sano imu fadoc. Tuna Kopotorocho yu wōmai sa kumbongnodec yi bucin fohong yungo sendec fet figoc. Sen wo wōmai iditnoho iditno itnahing. Tuna yu woce torengga itmuya onnga bongono morōmadec Kopotorochon mata youpdec itnahing. ⁷ O worochon torocgon wōmai taun yai Sodom orin Gomora, orin taun au ambehegon idungma yu ambarac sum yaruho boyōmoma tongidungma ihorocnogon youp göra orin toroc kiap yangam fapfapni tong tongidung. Tuna Kopotorocho yu urago wōmuno imuna ep arangum iditnoho iditno engocma worocho yu

dongyun obukogung. Oro toroc kiap ihorocno owi amna osucnodec öngku-bungma wömai nontho yanaya worocho wömai nonthon garac noni itun.

⁸ Oro, worochon torocgon wömai imanang amna sonot idangma yu duc itu tongga inoin godip föbo dongyu bet fadidang. Tongo yu amna auhon duc masumbodidang. O yu momphon sum yaru inong saha tongidang. ⁹ Oro sum yaruhon dugo mano Maikel, yu ihoroc matongidoc, muno sinom. Maikel yu dogu kopotot Mösehon ep fambangnoha mataho emoc togomorocan bongono wocin wömai yu dogu kopot inong saha mati urago maimogoc. Muno yu mata tungu ingorocgon inogoc, ‘Kopotorocho wömai urago gampun!’ ¹⁰ Yu ihoroc togoc mahong imanang amna worocho wömai yapmu tuctugo makombiingma worocha wömai yong moin moin yongidang. Yu toroc kiap tungugon wömai tuctugo kombineidang woi arap kombic kombicno muno woroc simbang inoin godip föbhon ibibo tantan kiap. Tuna kiap worochogon sinom wömai yu dongyu obukongidang.

¹¹ Yu wo woi Kainthon uyap tanidang. O yuho Balamphon toroc kiap tanmuya mönengha tongga kombic kombicno obukongitac. O yu Korahon toroc kiap sogida Kopotoroc ayam tong imongidang. O Koraho obukogocma worochon torocgon yui obukongidang.

¹² Oro, son irot tungu singmuya nacro nocnocha suran tongidangan bongono wocin wömai amna worocho sonot ida toroc kiap yangam fap-fapni tuya suran soniho Kopotorocho yangamin bet faditac. Amna wo yu inohagon kombineidang.

O yu mom simbang sumpno busuna woce woce ongtongo guroc yamuc ogepma maimongidang. O yu ep simbang boinno muno birucgon tongöang. O yu fonsirango muno amnaho det fiuya obukogung. Mayain, yu boinno sinom omoc koinghon fat idang. ¹³ O yu toroc kiap yangam fapfapni tongidangma woi yamuc funfuro simbang toup öngidang. O yu fitnung momdec uyapno imu fadocma woroc simbang gorong ongidang. Ihoroc tuya Kopotorocha urop sa kumbongno sinom yuha yongo tong arangarang tongo sigoc. Tuna yu yi bucin woce iditnoho iditno idtongonahing.

¹⁴ Amna worocha wömai Adamphon morogo namba 7 mano Enoch, yu yong tuctuc mata ingoroc sigoc: ‘Aarut, Morömahö sum yaruni tausen tausen yangauna epnahing. ¹⁵ Engmuya yuho owi amna ambarachon matano yun bödeangoc. O yuho owi amna Kopotorocha me imongmuya toroc kiap wömunö tongidungma orin yu inong moin moin tongidungma worochon urago wömunö imangoc.’ ¹⁶ Imanang amna wo yu wömai manomano ambaracha yong moin moin yongo mata metec yongidang. O yu nucniha mata metec yongidang. Yu inoin godibohon ibibogon tanidang. O yu inoin ma toup töngöang. O yu owi amna inong yamuc tong imuya yu inoin kombic kombicgon tarantang.

Kombing tobic tobic soniho irot soni tong koing tong kampun

¹⁷ Nakain nucnai sinom, Moröma noni Yesu Duic yuhon aposelniho son osucgon mata kanogungma worocha kombingitnung. ¹⁸ Yu

ingoroc kanogung: ‘Bongono madango wocin wömai amna au öngkungga fatmata ogepmaha yong moin moin yong tongonahing. O yu Kopotoroc makombing iming. Munu, yu inoin irot kombic kombichon ibibogon tannahing.’
¹⁹ Amna ihorocnoho wömai suraro soni tong ficfuc tongidang. Kunkun Yaruho yudecu maec. Munu, yu wömai guroc ngorochon kombic kombicgon tannidang.

²⁰ Oro nucnai son ihorocno munu, sonthon kombing tobic tobic soni woi yapmu kunkun ogepma sinom. Worocha tongga son muyu woroc kokorengmuya irot soni koing songga mac fingitnung. Ihoroc tuna Kunkun Yaruho son tongfat keuna dönac youp tongitnung. ²¹ Kopo-torocho sontha toup kombinegitac. Tuna son yu imu faicha. Munu, son muyu Moröma noni Yesu Duic yuha torengga iditnung. Yuho ehangocan bongono wocin wömai yuhon banac banacno koing suna itonggong koing sogitnahing. ²² Oro sondecma amna auho wömai irot yai tongidang. Tuna son muyu yu yang banango toroc kiap ogepma indaarut. ²³ O auho ep bohöng onggongon uyapdec idang. Tuna son muyu yu tongfat yeuya uyap ogepmadec yangat fongorut. O au wömai godip föbohon toroc kiap betniho yu yangtoreuna worochon toroc itongidang. Sonu yu yacyacho idarut. Wohong son muyu yu yang-banangmuya tongfat yearut.

Yong moröng mata

²⁴ Kopotoroc yu ogep son kangtoreuna son mamuning. O yu ogep son kangat fonguna yuho

yangamin wairuru yagunobarac woce itnahing.
Tongo sonu tong bumbum soni muno irot
borongdetno sinom tuna woce idtongonahing.
²⁵ Kopotoroc yu tungugon itac. Yu wömai non
wömunodecma öcangyun muuya itonggong tun
öngkung nimogoc. Yuhagon wömai nonu Yesu
Duichon madec yong moröng imongitnahamon.
Yuhogon wömai onoce sinom itun, o yuhogon
manomano ambarachon bigo itun, o gesö
ambarac wo yuhon fatgon itun. Woi öngahu o
mithu o bongono muno! Woi boinno.

Fat Mata ogepma
The New Testament in the Yau language of Papua New
Guinea
Nupela Testamen long tokples Yau long Niugini

Copyright © 1997 The Bible Society of Papua New Guinea

Language: Yau

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-21

PDF generated using Haiola and XeLaTeX on 11 Nov 2022 from source files dated 9 Oct 2020

b370e7dd-b560-5ac0-99e4-d6ccdf9cbc4